

IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS

COLLEEN E. LORENNIJ and,
ROMITA ENOCH

Plaintiff(s),

-vs-

HILLA ENOCH

Defendants.

CIVIL ACTION CASE NO. 201-0-182

MELELE KO ILO CASE IN

FILED

JAN 29 2013

ASST. CLERK OF COURTS
REPUBLIC OF MARSHALL ISLANDS

RO UWAAN PANEL EO:

WALTER K. ELBON, CHIEF JUDGE
NIXON DAVID, ASSOCIATE JUDGE
GRACE LEBAN, ASSOCIATE JUDGE

RAAN IN RONJAKE:

NOVEMBER 11TH and 13th, 2013

JKIN RONJAKE EO: ULIGA COURTHOUSE, MAJURO ATOLL

WAWEN KO KAR KOMMAN:

Kajitok eo kar jakemantak non Traditional Rights Court panel eo non uake im kwalok an lemnak kake ej:
“Won ian rein, Colleen E. Lorennij im Romita Enoch, im kab Hilla Enoch im ro rej erra ibbeir ej kabwijer
maron eo an Alap im Senior Dri-Jerbal ilo Unej Wetu, bukon in Jeirok, Laura Village, ilo Majuro Atoll,
Marshall Islands?”.

UAAK EO NON KAJITOK IN: HILLA ENOCH.

KOMELELE KO ILO TU KADRU IN IM UN KO REKKAR NON UAAK EO:

Hilla Enoch ej armij eo eritotata emman nejin Tarkeim Enoch. Hilla ear lotak, drik, im ritelok wot iben
Tarkeim, kora eo jinen ilo Unej Wetu ilo bukon in Jeirok, Laura Village, Majuro Atoll, Marshall Islands. Ilo

kar naan in kamol ko an Hilla ear ba ke ear bar jiban kora eo jinen Tarkeim Enoch, lale dritto ro, Linlok im Jerkak, ro im kar jikior weto in. Linlok im Jerkak jimor rar komman kalimur ilo naan wot im jab ilo jeje ikijen won eo enaj jolete maron ko aero einwot Alap im Dri Jerbal non Unej Weto.

Tarkeim ear signed join **Bujen Kalimur** eo im kar jeje kin typewriter im kar komman ilo September 27th, 2004 eo. Ilo **Bujen Kalimur** in ej ba wot ke ej lelok maron eo an alap non Mrs. Colleen Enoch Lorennij, im maron eo an Ri-Jerbal non Ms. Romita Enoch. Iloan bujen kalimur in make ej jab kwalok ta un eo elap bwe en kar komman einwot in. Ilo kar nan in kamol ko an Iroj Alden Namna, eo im ej bok jikin late Iroj Telnan Lanki, eo im ear sign I bujen kalimur eo an Tarkiem Enoch, ear ba bwe kalimur in ejab ekkar non mantin Marshall einwot ke eloke ro jet nejin Tarkeim Enoch im ro jet ilo bamle eo an. Rien Enoch, eo im edriklok jen Hilla Enoch, ilo kar naan in kamol ko an ear kwalok ke e bareinwot ear mour im jokwe ilo weto in Unej. Ear ba bwe ear jab jela kin jabdrewot un ko im ta unin an kar Tarkeim Enoch komane kalimur in im loke e im ro jet nejin.

Dri Abnono ro rej ba ilo abnono e aer im ear file, ke Defendant in im ro nejin ekka aer kakure aenoman im kabononoik er ilo aer bok jen leen men ko kotokaer einwot ni ko, banana ko, ma ko, im kab lime ko me Plaintiff rein rej ba katokaer ilo weto in im rej bareinwot jiuoki im kakuri. Bareinwot kili aiboj lol eo Plaintiff ej kojerbale aolep raan. Defendant eo lo uaak eo an im ear file ej ba bwe ej limaro mandren ro im rej komman boktak ko ion weto in bwe rej jibarek bwe en er eo im maron eo an Alap im RiJerbal en bed ibbeorro.

Panel eo an TRC eo im ear ronjake case in im komman etale ko ej lo bwe ejelok juon un elap bwe en kar komman kalimur in non bok maron eo jen Hilla Enoch im Rien Enoch, im lelok non ledrik ro mandre erro. Einwot an kar Hilla Enoch drik im rittolok im bed wot ilo weto in iben jinen Tarkeim Enoch, im jibane lale ritto ro kar aer weto in, inem ejimwe im jejet bwe en jolete maron eo an Alap im RiJerbal alkin jako eo an Tarkeim Enoch.

Weto in ej an aolep ro nejin im jibwin Tarkeim Enoch im ro elikior. Jej watoke bwe ej juon imon bwij jino iben Tarkeim. Mene Hilla Enoch ej e eo ej kabwijer maron in Alap im Ri Jerbal einwot ke e eo eritto tata nejin Tarkeim, ak ro jet jatin im ro nejior ren bar wor aer maron on weto in. Men ko kotokaer im men ko mweior makmake Hilla ejab aikuj in anemkwjoj ioer. Ej bar aikuj kobellok ial ko aer non mwon jokwe ko aer ilo weto in.

ETAN DRI KAMOL RO NON DRI ABNONO:

1. Jorbit Mojetin
2. Colleen Enoch Lorennij

ETAN DRI KAMOL RO AN RI JUMAE ABNONO:

1. Rien Enoch
2. Alden Nemna
3. Hilla Enoch

KEIN KAMOL KO KAR BUKI:

1. Plaintiff Exhibit A
2. Plaintiff Exhibit A1

WAWEN KO JET PANEL EO EJ TOMAK BWE REJ AIKUJI WALOK:

Einwot an party kein jimor erra kake jen kolmenlokjen ko aer make, Unej Weto ej imon aje ak Kalotlot non Tarkeim Enoch jen Jerkak. Ejimwe im jejet wawen kolmenlokjen in kinke Tarkeim ej eo im ej jinen family in im aje in emaron kar e im ro nejin einwot ke rar bar lale ritto ro im kar jikior weto in. Im einwot ke emwij an oktak im juon imon bwij jino ibben Tarkeim Enoch, ejimwe im jejet bwe en kar mokta konono kake kalimur in iben aolep ro nejin.

Ilo manit im iminene ko ad einwot Dri Marshall bubu im jimma ekka wot aer kokajiriri ro jibwier im lap aer kautej er im bokake ta ko rej ba. Im einwot ke bwe juon kalimur eo ikijen maron ko ion bwidrej en wor kitien, ej aikuj wor lukun un ko rellap non kojekdron ak jolok ro me ekkar bwe ren kar er eo. Einwot ilo case in Hilla Enoch im Rien Enoch rej ro rerito im imaan tata nejin Tarkeim enoch im rar bed ibben Tarmeim ilo aolepen iio in mour ko an im bareinwo jiban ritto ro me kar aer weto in Unej.

Colleen E. Lorennij im Romita Enoch im ro nejiro im aolep ro ilo lajrak eo an Tarkeim Enoch rej armij in bwirej in im ewor aer bar maron ie. Ewor aer maron non karroiki melan mon jokwe ko aer im jokwe ie im mona jen men ko kotokaer. Hilla Enoch enwot juon eo unlepeir im ritotata ilo bamle in an Tarkeim Enoch ilo tore in, ej an eddo einwot juon Alap im Senior Ri Jerbal, lale im kojbarok er.

Raan: 01/29/14



Walter K. Elbon
Presiding Judge of the Panel
Traditional Rights Court



Nixon David
Judge of the Panel
Traditional Rights Court



Grace Leban
Judge of the Panel
Traditional Rights Court